

Embargo: Hanya boleh diterbitkan atau disebarikan mulai jam 1200, Isnin, 28 Julai 2025



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

LAPORAN STATISTIK UPAH PEKERJA (SEKTOR FORMAL) SUKU TAHUN PERTAMA 2025

Median upah bulanan sektor formal meningkat kepada RM3,000 pada Mac 2025

PUTRAJAYA, 28 Julai 2025 – Median upah bulanan adalah RM3,000 bagi 6.8 juta orang pekerja sektor formal pada Mac 2025, seperti yang dilaporkan oleh Jabatan Perangkaan Malaysia (DOSM) dalam **LAPORAN STATISTIK UPAH PEKERJA (SEKTOR FORMAL) SUKU TAHUN PERTAMA 2025**. Angka ini adalah 5.5 peratus lebih tinggi daripada RM2,844 yang dicatatkan tahun sebelumnya, seiring dengan peningkatan guna tenaga yang berterusan, dengan jumlah guna tenaga formal masing-masing meningkat sebanyak 3.1 peratus, 3.4 peratus dan 3.6 peratus pada bulan Januari, Februari dan Mac.

Mengulas mengenai penemuan statistik yang diperolehi daripada data pentadbiran, Dato' Sri Dr. Mohd Uzir Mahidin, Ketua Perangkawan Malaysia, menyatakan bahawa peningkatan median upah bulanan menandakan landskap pasaran buruh yang lebih menggalakkan, disokong oleh dasar terkini seperti semakan ke atas kadar gaji minimum yang telah dilaksanakan, serta pertumbuhan ekonomi yang berterusan pada suku tahun pertama 2025.

Dari segi pekerja formal mengikut jantina, bilangan pekerja formal lelaki Malaysia mencapai 3.7 juta orang pada Mac 2025, menyumbang 55.1 peratus daripada jumlah guna tenaga formal dengan median upah bulanan RM3,000. Sebagai perbandingan, pekerja formal perempuan terdiri daripada 44.9 peratus atau 3.04 juta orang, memperoleh median upah bulanan sebanyak RM2,982. Berbanding Mac tahun lepas, median upah bulanan pekerja formal lelaki dan perempuan masing-masing menunjukkan peningkatan sebanyak 3.4 peratus dan 6.5 peratus.

Semua kumpulan umur mencatatkan kenaikan upah dengan peningkatan paling ketara dalam kalangan pekerja di bawah umur 20 tahun, median upah bulanan meningkat sebanyak 13.3 peratus kepada RM1,700 pada Mac 2025. Peningkatan ini disokong dengan ketara oleh pelaksanaan dasar gaji minimum yang disemak semula pada awal Februari. Bilangan pekerja formal juga meningkat merentasi semua kumpulan umur, kecuali kumpulan umur 20-24 tahun.

Dato' Sri Dr. Mohd Uzir Mahidin seterusnya menyatakan bahawa sektor Perlombongan & pengkuarian mengekalkan median upah bulanan tertinggi pada RM8,800 pada Mac 2025, walaupun meliputi hanya 0.6 peratus daripada jumlah guna tenaga formal, menunjukkan peningkatan tahun ke tahun sebanyak 4.8 peratus. Sebaliknya, sektor Pertanian yang menyumbang 1.9 peratus daripada pekerja formal mencatatkan median upah bulanan terendah iaitu RM2,200.

Dari segi geografi, Wilayah Persekutuan Kuala Lumpur mendahului kedudukan median upah bulanan pada RM4,445, diikuti oleh Selangor pada RM3,300. Sementara itu, Sabah (RM2,000), Kelantan (RM1,800) dan Perlis (RM1,800) mencatatkan median upah bulanan terendah.

Melihat kepada taburan upah, Ketua Perangkawan Malaysia menyatakan bahawa 27.4 peratus pekerja formal warganegara menerima upah bulanan di bawah RM2,000 pada Mac 2025, menunjukkan penurunan sebanyak 3.8 mata peratus daripada 31.2 peratus yang direkodkan pada Mac 2024. Selain itu, analisis persentil menunjukkan pekerja formal warganegara pada persentil ke-10 menerima upah bulanan sebanyak RM1,700 atau kurang. Walau bagaimanapun, kumpulan ini mencatatkan peningkatan upah bulanan sebanyak 13.3 peratus berbanding bulan yang sama pada tahun sebelumnya (Mac 2024: RM1,500). Sementara itu, pekerja dalam persentil ke-90 memperoleh sekurang-kurangnya RM11,000 sebulan, menunjukkan peningkatan 4.8 peratus daripada Mac 2024. Nisbah upah antara pekerja dalam persentil ke-90 dan persentil ke-10 menggambarkan bahawa kumpulan 10 peratus penerima upah tertinggi menerima enam kali ganda upah daripada kumpulan 10 peratus terendah.

Mengakhiri kenyataannya pada keluaran hari ini, Dato' Sri Dr. Mohd Uzir Mahidin berkata, "Statistik ini adalah berasaskan sumber data pentadbiran daripada agensi yang berkaitan, memberi tumpuan kepada warganegara yang bekerja di sektor formal, khususnya di sektor swasta. Perantaraan hadapan, DOSM akan terus memperkukuh penyebaran statistik upah pekerja dengan mengintegrasikan pelbagai data pentadbiran untuk pengeluaran statistik yang lebih terperinci bagi pemahaman yang lebih mendalam tentang pasaran buruh negara."

Data siri masa dan maklumat lanjut berkaitan pasaran buruh boleh diperolehi dari portal Hab Data Pasaran Buruh (MyLabourHub). Untuk maklumat lanjut, sila layari <https://mylabourhub.dosm.gov.my> atau imbas kod QR di bawah.



Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema 'Driving Change with Quality Statistics and Data for Everyone'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
28 JULAI 2025


Paparan 1: Median Upah Bulanan, Januari 2024 – Mac 2025




Paparan 2: Median Upah Bulanan mengikut Jantina, Januari 2025 – Mac 2025




Paparan 3: Median Upah Bulanan mengikut Kumpulan Umur, Januari 2025 – Mac 2025



Paparan 4: Median Upah Bulanan mengikut Aktiviti Ekonomi, Januari 2025 – Mac 2025



Paparan 5: Median Upah Bulanan mengikut Negeri, Januari 2025 – Mac 2025



Paparan 6: Taburan Pekerja Formal mengikut Skala Upah, Mac 2025

